

صفحات

محمد عاكف

صفحات

محمد عاكف

برپنجی کتاب

اوچنی طبعی

استانبول - آمدی مطبعی

۱۳۴۶ هـ - ۱۹۲۸ م

اولاد محمد علی یه
یادگار و دادمدر

بگا صور سوگیلی قارئ، سکا بن سویلیه‌یم،
نه هویتده شو قارشگده طوران اشعارم:
بر ییغین سوز که، صمیمیتی آنجق هنری؛
نه تصنع بیلیرم، چونکه، نه صنعتکارم.
شعر ایچون «کوز یاشی» دیرلر؛ اونی بیلیم، یالکز،
عجزیمک گریه‌سیدر بنجه بوتون آثارم!
آغلارم، آغلاده‌مام؛ حس ایدرم، سویلیه‌مم؛
دیلی یوق قلبمک، اوندن نه قادار بیزارم!
اوقو، شاید سکا بر حسلی یوره‌ک لازمسه؛
اوقو، زیرا اونی یازدم ایکی سوز یازدمسه.

فاتح جامعی

یاتارکن یرده الحاديله حشر اولمش سفیل افکار؛
یاروب ادواری یوکسلمش بو مدهش هیکل اقرار؛
سیهرنک ضلالت بر بولوط شکلنده ماضیلر؛
جوارندن قاچار، بولمقسزین بر لحظه استقرار؛
ضیاریز حقیقت بر سحر طورنده مستقبل،
کلیر فوقندن ایلر سرمدی بیگلرجه نور ایثار.
در آغوش ایتمک ایستر نازنین بزم لاهوتی:
قول آچمش هر مناری صانکه بر امید جرأتکار!
او روزنلر، نظر لردن نهان دیداره مستغرق.
برر گوزدر که صیریلمش اوکندن پرده اسرار.
بو قدسی معبدک اوستنده تابان فوج فوج ارواح،
بو علوی قبه نك آلتنده جوشان موج موج انوار.

تجسد ايله مش كويا كه صبحك روح مخمورى؛
 سمدان يا خود اينمش خاكه، سينا رنك اولوب، دیدار!
 طبيعت پرده پوش ظلمت اولمش، خوابه طالمشكن،
 او، كويا قلب نورانيسيدر ليك، طورور بيدار.
 اوت بر قلبدر، بر قلب جوشا جوش عاشقدر،
 كه جوفندن دمام يوكسلير بيك ناله اذكار.
 نمايان جبهه سندن صدر اسلامك معاليسى:
 او صدرك فيض انفاسيله كويا بر ييغين احجار،
 قيام ايتمش ده، يوكسلمش ده بر تمثال نور اولمش؛
 ناصل تمثال نور اولماز؟ شو پك ساكن طوران ديوار،
 عصرلر كچدى حالا باطللك پيش هجومنده
 كوكس گرمكده در بر كره اولسون اولمه دن بيزار.
 بو بر معبد دكل، معبوده يوكسلمش عبادتدر؛
 بو بر منظر دكل، دیداره واصل موكب انظار.
 سمدان اينمه مشدر، شبهه سز، لكن سماويدر:
 زمينى اولمیان بر جلوۀ فياضى حاويدر.

*

*

*

بر انفلاق صفادر که یار جانمدر.
صبحی پک سوهرم، اک کوزل زمانمدر.
ردای لیلی هنوز آچمامشدی دستِ سما،
صبا ده خواب سکوندن آییلمامشدی دها،
فضای روحده عکس ایتدی، الصلا پرداز
مؤذّنک دم مخموری، بر حزین آواز.
ایچمده جوش ایدرک لجه لجه استغراق،
اذانی بکله مز اولدم، آچیلمه دن آفاق،
ظلامی سینه یه چکمش یاتان سوقاقلردن
کمال وجد ایله کچدم. اوگمده بر میدان
کوروندی؛ فاتحه کلمشدم آگلادم، آزیجق
کیدنجه معبده باقدم که بکله یور اویانیق!
صوقولدم آرتیق اونک سینه منورینه،
اوطوردم اوگده کی مقصوره جکلرک برینه.
فضای معبدک انجم نما مشاعلنی،
اولمعه لمعه دیزیلمش ضیا قوافلنی